

*MISCUGGHI*

## CHIDDU CHI SUGNU

Iu nun canusciu  
diputati e sinatura,  
ministri  
e sigritari di partitu.  
Nun sugnu amicu  
di coppuli cianchini,  
di Patreterni  
e Santi Prutittura:  
nenti pi nenti  
sulu nto Vangelu,  
nta certi libbri  
ch'i maghi e cu li fati.  
Chiddu chi sugnu  
fruttu di sudura,  
zappannu 'a terra,  
rumpennumi lu schinu;  
chiddu chi sugnu  
fruttu di tavagghiu,  
jttannu sangu  
e caddi nta li manu.

Libbirtà  
lu me' cumannamentu  
e nun c'è nuddu  
chi po' diri cosa.  
Nuddu  
a cui livari lu cappeddu  
pi grazia ricivuta  
o pi duviri.

## FIMMINA

Longa, curta, sicca o chinulidda,  
cu li capiddi a trizza o c'a fratina,  
cu la vuca suttili o carnusedda  
e l'occhi granni o nichì a la cinisa;

amica, zita, mogghi o puru amanti,  
bona di cori overu sarvagedda,  
quannu chi tocchi li cordi di lu cori  
ridi 'a natura, sonanu 'i campani.

Cu tia li jorna su' limpi e assulati,  
cu tia lu 'nvernu diventa primavera;  
straluci l'aria, fa festa lu criatu,  
volanu 'n celu aceddi cantatura.

## PIRRIATÚRI

Nta la pirrera,  
c'a subbia o cu lu filu,  
armiggiannu  
cu arganu e cu binta,  
lassi sudura,  
ci lassi li to' forzi,  
ci lassi 'u sonnu;  
e friddu dintra l'ossa.  
Li manu tutti caddi,  
jdita storti,  
dulura nte juntura  
e schinu ruttu: quannu  
nte petri o nta li tagghi lisci,  
nun lassi puru 'u sangu  
e la to' vita.

## LU LOTTU

Quannu chi moru e partu pi lu celu  
lassannu 'n terra riordi e 'sti quattr'ossa,  
cu lu sapi si quarcunu a la scurdata  
(tra un annu, deci, un seculu o chiù dda)

liggennu la me' petra o' cimiteru,  
o puramenti p'u fattu di 'sti versi,  
o a discursu di machini e di cursi  
nun ci spirciassi di parlari 'i mia!

E cu' lu sapi soccu ni dicissi?!  
Soccu vinissi fora da' me vita?!  
Soccu du' talianu e 'u sicilianu?!  
Di 'sti libbra scritti a la scurata?!

Di lu pueta ch'era curriduri  
e armigiava cu aratru e cu zappuni?!  
M'addisiassi d'essiri acidduzzu  
p'ascutari... 'sti numari du' lottu.

## RAGGIA DI PICCIUTTANZA

Picciutteddi  
cu li causi arripizzati  
e cu li scarpi rutti,  
ricchi di gána di risati,  
smaniusi di jucari  
a lu palluni, 'o triu o' triu,  
a tivitti e nesciu, a libbiru tutti.  
'N casa  
sulu lu tempu nicissariu  
pi fari 'n prescia li compiti p'a scola  
e pi manciari a tipu assicutati.  
E poi...  
poi fora pi jucari.  
E cursi, e cursi,  
e cursi ancora;  
chilomitri e chilimitri  
pi strati, pi vaneddi e pi trazzeri:  
pi sfuàri  
tuttu lu viguri chi c'è dintra,  
tutta la raggia  
di la picciuttanza.

## CURSI

Scrusciu  
di mutura arraggiati  
chi strazzanu l'aria!  
Machini,  
comu fulmini,  
chi volanu p'a strata!  
Roti  
chi friscanu nte curvi!

E... manu di lignu  
'nzirragghiati a lu vulanti!  
E... occhi di focu  
sutta di lu cascu!  
E... 'u cori 'n vucca  
chi batti a centu all'ura!



## LITTRA A 'N AMICU INTIMU

Amicu meu, sugnu ancora 'n pedi.  
Lu cori? A postu, propriu 'un c'è chi diri.  
Dopp'u 'nfartu vinutu a tradimentu  
curi e giudiziu, a' fini su' guarutu.

'I primi tempi, megghiu 'un ni parlari.  
pinsava sempri d'essiri 'nta fossa;  
ma a picca a picca, pinnuli e gnizioni...  
finiu 'u malannu e puru lu scantazzu.

Lu fattu: pani-pani, vinu-vinu;  
nè ci ni mettu e mancu ci ni levu.  
Ti dicu: doppu 'na cinchina d'anni  
mi misi 'n sestu, quasi comu prima.

Ma ora... ora affacciaru li dulura:  
fa mali 'u vrazzu, l'anca, lu dinocchiu...  
'U fattu ch'i sittanta su' vicini:  
lu cori teni, ma 'u restu trabballia.

E d'accussi m'allibbertai du 'nfartu  
ma sugnu malu misu p'atri cosi.  
A virità chi doppu 'a sissantina  
s'avissi a canciari micicata:

o' postu di pinnuli e gnizioni  
ci fussi di canciari tanti cosi:  
cori, gammi, lu ficatu, purmuna...  
Megghiu... si si canciassi tuttu paru.

## QUANNU CHI CHIUDU L'OCCHI

Quannu chi chiudu l'occhi  
e sugnu nta la fossa  
vogghiu chi si liggissi  
nta me' petra:  
Amau 'a so' Terra,  
li rosi, la campagna,  
li figghi, la mughieri,  
'i niputeddi.  
Fici li cursi  
e ni vinciu 'na fudda;  
scrissi li versi  
cu lu cori 'n manu.

## SIQUESTRI

Ancora siquistrati...  
E matri, patri,  
mariti, mogghi, figghi,  
cu la morti nta lu cori,  
ad aspittari,  
tra riscatti... e chiantu.  
'N Calabria,  
nta li casi di' sbannuti,  
autri matri, autri patri,  
autri mogghi, autri figghi...  
autri parpitazioni  
ed autru chiantu.

## CURRINU

Cu li fari sbampàti  
e li machini 'mpurtanti,  
carrichi d'amici 'ncuscienti,  
pi strati e autostrati  
currinu  
li figghi di papà.  
E sunnu sperti!  
E friscanu li roti!  
Cu la patenti pigghiata avànnu  
sunnù già Villuresi e Nuvulari...  
E currinu  
versu un muru, un palu di luci,  
contru 'na machina...  
e 'u spitali.  
Poviri patri  
chi nenti sapiti nigari  
a 'sti figghi vizziati!  
Sulu quannu  
scurri lu sangu nta l'asfartu  
e l'ossa rutti,  
chianciti dispirati.

## GRANEDDI DI RINA

Li nanni,  
me' patri,  
'i me' cumpagni,  
iu,  
tutti...:  
graneddi di rina  
nta 'na spiaggia scunfinata!:  
Veni un marusu  
e si ni porta sarma!  
Sciarri,  
verri,  
ammazzatini...  
e semu nenti!

## E SCRIVU VERSI

Acchiali,  
'na pinna,  
un pezzu 'i carta...  
Grapu lu cori a' vana  
e a lu buliu...  
e scrivu versi.  
Di jornu,  
di notti,  
'n casa,  
pi la strata;  
ogni vota  
chi la Musa mia  
sona a battagghiùni  
nto me' cori.

## PARCU DI LI RIMEMBRANZI, A NAPULI

Machini,  
machini  
e machini acciancàti.  
E vitra  
'nfurrati di giornali!:  
Ammucciàgghi  
p'abbrazzatini,  
strincitini,  
accusciatini  
d'amanti cantuniati.



## 'A SPONZA

Comu 'na sponza, si la metti a moddu  
assuppa l'acqua e la tratteni dintra  
e quannu 'a spremi a jocu e piacimentu  
t'a renni arrèri senza nuddu sforzu,

'cussi la menti nostra mimurizza  
soccu succedi nta la nostra vita  
e all'occorrenza, pronta a lu cumannu,  
ni lu presenta di novu, paru paru.

Sulu c'a sponza, quannu duna 'u sucu,  
pigghia e sdivaca tuttu a la rinfusa;  
mentri la menti cerni lu passatu  
e n'appresenta chiddu chi ni servi.

Certu, cu mancia spissu fa muddichi  
(quarcosa nta la fudda va pirdutu);  
ma quannu chi si tratta d'oru finu  
chissu ni lu cunserva a postu bonu.

Nun sulu: si si tratta di riordi,  
riordi dunni c'entra 'u sintimentu,  
idda li sarva nta 'na cascitedda  
cantuniàta nto funnu di lu cori.

Ti poi scurdari di scola e prufissura,  
d'amanti, canuscenti e passatèri;  
ma lu riordu di' pirsuni cari  
lu trovi dintr'o cori, doppu mortu.

## FERA DI RAUSIA

Pecuri, porci, addini...  
un sciccareddu.

Li denti, li dinocchia,  
lu schinu, la cudèra,  
talia lu cumpraturi.

.....

Ora

è a patruni novu  
e aggibba, mischineddu!

Nuddu

chi vidi la so' pena:  
la matri

chi lassau nta stadda  
e 'dda putra, nta pinnata,  
c'arragghia ancora,  
sula e scunsulata!

## MUSTRA DI ENZU RUMEU

Un balconi,  
'na facci,  
un paisaggiu...:  
Pinziddàti  
nta 'na tila.  
Quatri dilicati,  
picciriddi,  
pittati  
ch'i culura  
du' buliu.

## LA MUNTISEDDA

Rinumata p'i biddizzi  
puru e' tempi saracini,  
cu lu mantu nta li spaddi,  
cu lu sulì, cu lu gelu,

porta longhi li capiddi,  
nta lu tuppù agghiummuniàti,  
caminari lestu e nicu,  
du' russetti li masciddi.

Passa e va la muntisedda,  
minutedda di statura,  
carinusa e dilicata,  
cosa duci di batia.

## LIBBIRTA'

S'arribbillàru  
li populi di l'Est!  
'Nsurginu  
e rumpinu catini!  
Nenti chiù  
comunismu cu Lenìn;  
nenti chiù  
atomica e armamenti.  
Scurri lu sangu nta li chiazzi,  
ma Libbirtà vola pi lu celu!  
Cadiù lu muru di Berlinu,  
s'abbattinu l'urtimi cunfini.

.....

Tutti frati  
nta 'st'Europa nostra  
e c'a cirtizza  
di manciari 'u pani;  
d'aviri travagghiu e Libbirtà,  
campari 'n paci  
comu voli Diu.

## QUANNU CHI NASCI

Quannu chi nasci  
lu jornu a la matina  
e grapu l'occhi  
e surgiu di lu lettu,  
sentu lu cori  
chi s'allarga e ridi,  
sugnu acidduzzu  
chi scuva di lu nidu.  
Quannu chi 'nveci  
chiudi la jornata,  
(la sira cala,  
lu sulì a lu tracoddu),  
sentu di dintra  
moriri quarcosa,  
sentu c'ù tempu  
vola e sinni fui.

Cursi; lu palluni;  
l'amuri tutti 'i jorna...  
Sugnu d'accordu, cosi di picciotti.  
Però, pi fari certi cosi,  
c'entra 'u viguri  
ma puru 'u disidderiu.  
Siddu 'nn'hai fami...  
e chi t'assetti a fari  
cu tavula cunzata e cu pietanzi?  
Ogni staciuni, lassamillu diri,  
avi 'ntressi chi sunnu primententi:  
lu scialacori di canna e trimulina,  
vuliri beni a cu' ti sta vicinu,  
'na passata fatta all'aria aperta,  
pensi li po' capiri un picciutteddu?  
Ogni staciuni  
avi li so' 'ntressi; e...  
Nun lu capisci  
si prima nun lu provi.



## PUPI DI PEZZA

Palluna unciati  
sacchi misi addritta,  
tridicini  
sempri nta lu mezzu.  
Si fannu largu,  
si mettinu 'n vetrina  
comu brillanti,  
e 'nveci sunnu urpeddi.  
Pi cu' 'i canusci  
e sapi soccu vannu,  
c'è d'allucchiri,  
ristari strabiliati.  
Pupi di pezza  
addritta pi scummissa;  
basta un ciusciuni  
e 'u ventu si li porta.